

溫江縣志卷七

官吏第七

溫江自建置以來歷唐宋元明上下千年間必有神明之宰爲民父母師帥大有造於我邑乃四朝文獻凋落前徽闕然無從徵信爲可慨也舊志載宋楊鈞眉州人天聖進士由大理屬出爲邑令有致遠長才博通古今明李端湖廣進士以御史忤汪直謫永寧經歷署溫江操守清白政惟愛民歷任知府施之炳南京舉人爲邑令崇禎十七年死難若三公洵皆良吏惜政績不詳豈

溫江縣志

卷七

官吏

一

川文三

治績

清知縣

蕭永茂

王日講

蕭永茂漢軍鑲白旗廕生康熙三年任邑令時經張獻忠屠戮焚燬之餘地方荒殘百廢待舉邑民皆四方流氓胥以大興工役爲難永茂在荒煙蔓草中自捐廉俸

建立公廨夫匠趨役者人給米一升銀二分每十人給鹽茶蔬酒若干遠近聞之忻然赴工落成凡祠廟載祀典者皆以次建立瘞遺骸闢荒土修津梁勸農桑興學校凡百拮据靡憚其勞方經營之始眾或難之永芑曰必居其易誰任其難嘗奉檄督修都江堰鄰縣夫役不至永芑懼曠延時日立即捐募夫役一百八十名刻期蒧事其熱心民事若此

王日講江南通州恩貢康熙十九年任邑令適灌縣都江堰工役溫江所出名夫過舊額十數倍民不勝苦累

溫江縣志

卷七

官吏

二

日講具詳大府緣溫江農田灌溉資水惟江安玉石兩堰至用都江堰水惟天王寺附近農民六家舊例都江堰工大修溫江縣出夫十名小修六名以爲常康熙六年邑令蕭永芑奉委督工他縣夫役不齊永芑恐誤期督隨帶衙役雇募番夫修理以百八十名具報以後遂援爲例日講至是屢詳大府具呈本末請復舊例以免李代桃僵大府委員踏勘得實照復原例永芑初意只傾力赴公非爲溫民遺禍而上官竟以爲例日講之請誠非得已使溫民不受無窮之累皆日講賜也

王瑚

埭典史
屈逢善

王宗祐

楊以寧

王者聘

王瑚漢軍鑲紅旗監生康熙二十二年任邑令自蕭永
芑後邑宰專尙休息無爲瑚涖任見地方凋殘未復日
夜謀所以勞徠安集收瘞枯骸養老恤孤捐穀濟貧勸
課耕種輿梁道路畢修一時庶務悉舉且垂意文化捐
俸重建黌宮振興學校待士優異導民以禮婚嫁宴會
不得奢靡踰制亂後文獻盪然無存復搜殘訪舊創修
縣志表章賢良節義忠孝俠烈以勵風教稱賢吏焉典
史屈逢善贊襄政務殫心瘁力亦著賢聲

溫江縣志

卷七

官吏

三

王宗祐廣東樂會人康熙甲子舉人四十五年授邑令
邑苦旱澇不時宗祐悉心水利風纏露沐不畏勞頓大
江自灌縣離堆下十里東分支渠爲新開江經邑北東
正流爲金馬江經邑西南宗祐爲築江安堰均其水勢
又於大江下流濬楊柳渡使邑全境均獲灌溉於是旱
不病乾水不病潦田野膏沃禾麻蔚茂民享其利無窮
楊以寧江南人舉順天鄉試康熙六十一年任邑令勤
理政事不辭勞勩時地方元氣已復生齒滋長凋敝之
象變爲富饒以寧銳意興學以培植人才爲己任士類

爭趨之設立義學若干所誦讀之聲溢於街巷性尤明決摘奸發伏人畏其神

王者聘山東蘭山拔貢雍正六年授邑令慈祥愛民恂恂儒吏以振興文教爲首務多士賴其培植邑學宮自王瑚修建後至是殿宇堂階漫漶寢毀者聘捐募重修增建崇聖祠三楹禮儀俎豆煥然一新邑東里許新開江所經流爲赴省通衢舊造土橋屢圯者聘創修石梁邑人德之擢內閣中書

馮中存 李天駿 宗郎

劉有儀 李紹祖

溫江縣志

卷七

官吏

四

馮中存直隸南樂人初爲諸生家貧授徒講學於大河南北者三十年成進士乾隆九年授邑令甫下車卽謀興學倡捐廉俸創修萬春書院於學宮之西落成奉欽定經書數十帙貯其中復置學田以供膏火公餘輒詣院與諸生析義訂疑娓娓不倦勉以明體達用之學邑人士受其甄陶多所成就復於學宮左右建名宦鄉賢忠義節孝等祠以勵風教建社稷先農各壇於郊爲民祈報歲時與民親講聖諭廣訓凡地方婚喪無禮之俗悉行禁革立申明亭以表是非善惡之公尤敦本重農

或親履阡陌勸課資以果餌農人懽抃一時政務無不勤理葺縣署修街衢繕城郭增雉堞建樓櫓周垣蒔竹柳餘暇補修縣志爲書四卷在任七年民蒙其福

李天駿雲南姚州進士乾隆十九年任邑令勤政愛民培植文教學宮及文昌廟皆捐置田畝以隆祀典道路津梁無不修理復捐廉創修養濟院於北街置田五十餘畝收養癯獨月給口糧俾窮民無告胥獲安全道光五年邑令宗印踵修復增糧額爲文勒石皆澤及鮮民食惠無窮云

溫江縣志

卷七

官吏

五

劉有儀江西奉新監生嘉慶十二年署邑令剛明果斷有古能吏風邑豪余人第性狡黠交通顯要嘗因事設謀執前令呂仕祺短遂挾制之以威福地方勢傾一時邑人語曰余開口呂坐堂鄉愚不畏法而畏人第之一怒列任莫敢誰何有儀接篆毅然以除人第爲首務捕之急人第飾婦服乘肩輿遁省城匿某鉅紳家有儀率健役搜獲之置於法大吏某私函緩頰卒遣發遠邊邑內肅然

李紹祖字述軒浙江錢塘監生嘉慶十三年任邑令肅

下車周覽四境欲得前事以爲師乃尋繹舊志時距馮中存編定後已六十年因於政事暇續修縣志書成未幾大府修全省通志檄下卽以書上之邑自唐建置歷宋元皆土城明成化間邑令李棠始築石城周六百六十七丈清乾隆中邑令海桂謝泰宸林儁等改修甃城周七百三十七丈自嘉慶十一年歷歲傾塌至三百餘丈五門樓櫓胥壞紹祖悉心籌費督紳修築兩載工竣并掘濠緣隄植柳七百株號柳城重修學宮及名宦鄉賢忠義節孝各祠并整葺縣治凡百政務靡不勤理在

溫江縣志

卷七

官吏

六

四十一

任六年邑境稱治

王聯陞 劉文蔚 江錫麒

王聯陞字小麟直隸元城人嘉慶丙子舉人道光十年署邑令悉心民瘼日夜竭蹶謀教養不衰重建書院立學規以造多士創修東養濟院籌置田產收養北院浮額窮民以廣慈惠大江自灌口南下至虎郎廟分一支爲楊柳江入邑西北境大江東決合迸逕張扉灘悍流疾湍衝突勢劇猛舊於東岸築內外隄橫插江中曰玉石隄以障東岸民田屢被沖塌聯陞下車卽力籌興築

隄基及身純用糯粥淖雜石鈔塗附取鞏固聯陞時往督工賞勞有加夫役人人感奮出力倍尋常工竣自是垂六十年不勞民力修治其惠及遠若此

劉文蔚字通軒江蘇武進進士道光十一年任邑令慈祥愛民敦尙文教親書正誼明道四字刊示書院諸生聽訟不輕施筆楚雖獲盜賊亦懇懇訓以改過自新給錢令覓生業遣之化及羣盜後因事鐫級大府檄赴滇購銅時川南及滇境萑苻充斥官吏目爲畏途文蔚怡然就道及反抵甯遠羣盜相戒勿犯且護送以歸文蔚沒後邑人思其德刻木像祀之

溫江縣志

卷七

官吏

七

川七

江錫麒字菱石安徽全椒優貢道光二十四年署邑令以化民厚俗培養士氣爲先務尤勤於治盜時土匪蔡璜糾黨橫行州縣大府索之急璜走宜賓錫麒遣幹役躡蹤獲之璜黨謀報復欲焚毀城邑錫麒不動聲色晝夜改裝巡查一夕於東門棧房查獲巨匪三名發火藥一擔置重刑匪謀始熄錫麒治縣日夜常出不爲風雨稍懈鼠牙雀角隨地訊斷民無訟累瓜期已屆卸任前夕三更猶在城東門外有居民曰新官已貼紅報我公

何自苦若是錫麒曰今夜若有變誰職其咎其勤民若此錫麒居官緼袍疏食自奉甚薄去之日囊橐蕭然老幼攀轅而泣者數千人錫麒諭童子曰汝等不必哭好讀書長大孝父母必能成好人至今耆老猶能道之在任時邑西居民伐檀析薪見蟻鐫木心成八分書文曰溫江縣清廉加三級已而果然士紳爲作頌以紀其事

章 燮 劉維嶽 潘銘鑒

章燮字晉洲貴州畢節舉人道光二十五年任邑令專崇教化以陶民俗邑人好訟爲撰息訟說戒之且刊布

溫江縣志

卷七

官吏

八

正俗戒殺等書啟牖愚氓一時化莠爲良者甚眾重修學宮規模宏偉大成殿棟木適中文成太極圖左右二龍繞之其文深入膚理論者以爲吾邑文化大昌之兆云

劉維嶽字松樵江西鄱陽府進士咸豐三年署邑令正己愛民尤勤聽斷案無畱獄呈詞卽日批發訊判以理爲主不問其爲何人或偶有誤不自諱過必再傳訊改讞然後已細民過犯不用重筭惟薄責以示儆藹然有古循吏風

潘銘鑒字穉泉廣西左縣舉人咸豐八年任邑令十年九月二十日黎明滇匪藍朝鼎率隊至雙瓦窑西城外人民紛潰哭聲動地防務督辦程祥棟在西門城樓上令軍士拋擲火彈焚燬城外民房使賊無所隱蔽時銘鑒在側曰賊未勦而先焚殺吾民豈大府委君督防意耶民房即可焚此數萬無辜之老弱亦可燬斃耶祥棟不聽銘鑒垂泣跪請曰團勇若勝此國家之福督辦之功也不勝吾惟全家殉此難耳若焚民房斃無辜卽殺賊亦功不贖罪設於事無濟咎將誰職吾有守土之責

溫江縣志

卷七

官吏

九

當與人民土地共存亡督辦若不從予請是重予之罪而速予以死也祥棟乃止賊旣敗走人民無不感頌銘鑒之德至今父老猶有稱之者

段東暹

吳崇階

沈樹樺

段東暹字梓升江西宜春舉人同治三年署邑令悉心民事不憚勞勩甫蒞任適養濟院董事某虧空口糧一百零九石五斗屆時無顆粒可支孤貧匈匈某畏罪自斃東暹立捐籌購米如數貯倉照章給發未補額者七十餘名亦捐廉按給錢若干并核定章程遴正紳經筦

哀矜怨讟變爲懽頌復籌增書院膏火裕三費局經費
初南城大水坍塌前令繕修工未半而輟東遷亟籌完
工以資保障城中衢路泥塗穢塞復督民修治四街如
砥又於四城隅濬文水武水水德水星四塘以禦災培
修武廟以崇祀典興廢舉墜凡所經營皆關大體東遷
以署印勤民若此視以官爲傳舍敷衍一切徒飽宦橐
而去者何翅天淵

吳崇階字殿臣安徽涇縣人龔雲騎尉世職同治六年
任邑令精明幹練悉心民事尤勤聽斷大堂懸鉦民有

溫江縣志

卷七

官吏

十

冤屈鳴之卽坐堂皇審實立簽喚被告究斷民無訟累
初苦煩勞久則宴然少事時蜀寇初平餘氛未盡官兵
過境畏崇階清嚴不敢騷擾尤加意文教獎勵人才爲
聘名士主講書院多所造就士林頌之

沈樹樺字叔波福建侯官舉人光緒八年署邑令正己
率下爲政持大體不苛細惟嚴剔衙蠹差役喚案但准
給草鞵錢一百遠者二百格外需索者處以法巨匪李
悶龍嘗拒殺制府親兵八名通緝未獲樹樺嚴飭壯勇
擒送督轅斬之以徇自是地方寧謐無劫盜案

施德培 張 鐸 趙家蕙

施德培字君懷浙江烏程人以諸生游幕入蜀官成都府通判光緒十四年署邑令甫下車卽爲文誓於城隍祠一不要錢二不要官三不要命設匾署前令民投牒言事懸鉦大堂訴冤者鳴之一時豪猾斂跡或遠颺境外有老猾胥某素爲地方大蠹因事發覺重責之錮獄中揭其惡懸諸四門并治其子濫冒功牌罪士紳或爲懇求悉受嚴譴官場爲緩頰復提訊重筆之母夫人旋轉亦不可卒處以法邑人至今稱快又擒地棍獨腳龍温江縣志

卷七

官吏

十一

川名

有大令某函解德培碎其函而置獨腳龍於法邑有素著土豪三人以時無故犯未發卸任後猶以三害未除爲憾德培在官鐵面冰心疾惡若仇而愛民如子邑養濟院聽審所舊爲劣紳姦胥蠹役把持上下百弊叢生德培嚴剔其弊悉心酌定章程刊布以蘇民病士之有行者尤優異之去之日邑人士餞以詩歌纍纍成帙城北老貢生鄢纒生平兀稟少許可獨謂施公二百年來無此官也作萬春紀實詩頌其德政丁母艱扶柩歸遂不復出

鄖纒萬春紀實詩萬春古治俗囂以繁京兆不作孰
清其源皇十四載我公蒞治拜命之初與眾匪異逮
閱數月迺咨迺詢迺濺其舊迺謀其新曰利與弊予
初罔罔曰淑與慝予久朗朗予視此官可塵可土予
視此邦可齊可魯而惜不德徒慕循良而愧不才遠
遜龔黃予惟汝眾毋猜毋疑予期與之共樂清時維
邑有吏憑社而處謂法可弄謂文可舞不納犴狴善
抉人腸不操矛弧善發人藏問挾何技飼官腐鼠問
憑何勢恃兒翼虎厥性豺狼厥毒蛇蝎厥厲磨牙厥

溫江縣志

卷七

官吏

十三

兇吮血既不爲掾又不爲吏積數十年負隅成勢豈
無壯夫盼不敢櫻豈無哲士鄙不與爭我公曰嗟茲
爲窳窳微予有司孰鋤而去維邑之頑以法之弛惡
少幾輩羣聚而起其渠帶劔反德賣牛其徒佩刀賣
犢效尤蔑視長官何啻木偶玩視市人何啻芻狗武
探赤丸將萌其孽文探黑丸將襲其迹蠅畢類附羊
益羣從胡憚有北胡恤桓東我公曰嗟茲爲魑魅微
予有司孰翦其銳維邑之瘼訟或被拘初曰下馬一
食百夫逐日計飯飯珠一粒逐日計肉肉金一鎰膚

盡見脂誰樂自全胸洞達腋誰不自憐奈何蠹役四
角徼徇奈何舍長九首蠶蛭不伐銅山曰徼且繫不
括金穴曰歸勿計上戶猶可中產豈支輕者傾覆重
者流離我公曰嗟茲爲饕餮微子有司孰剋而剔維
邑巨姦有如翁伯厥黨亡命厥行匪法晝與侶謀某
豐某歉夜縱侶出某鄉某宅如宋淮南而掠加橫如
鄭蒲澤而坐取盈於茲累世以飽以溫以燕翼子以
貽厥孫鄉鄰雖疾畏不敢仇親戚雖惡諱不轉喉我
公曰嗟茲爲躑跖微子有司孰偵而獲凡此種種皆

政之良仲卿北海翁卿南陽抑此種種類人之難反
冬與暘假春與寒萬春地腴公筭常空而曰聽之靡
易初衷萬春民飮公厨常乏而曰安之脫粟亦得計
官代謝更僕難終三十年來迺見我公我公不矜謂
淺於識匪識之淺而心之抑我公不伐謂疏於才匪
才之疏而理之裁爾民食德爾心須喻告爾父兄及
爾子弟刻骨鏤膺毋忘愷悌傳於後日登之信史昔
我萬春隱於雲霧今晤青天日耀月注昔我萬春淪
於重海今出九淵游行自在政在人心譽者人口村

謠巷諺何無何有懷終勿釋筆終欲把永言誌之以
勸來者

張鐸字振之陝西蒲城舉人光緒十五年任邑令甫蒞
任卽有民教涉訟事鐸據條文處之事遂寢民書扁頌
之曰好惡同民鐸性嚴明不專寄耳目於左右御下恩
威並用家丁胥役不敢售其姦好接見士民博訪兼聽
遂於邑人賢否風俗得失及閭閻細故無不周知詞訟
是非不勞而立判尤嚴除獄卒私刑革汎地賭局增書
院膏火造大江浮橋皆其惠政之犖犖大者以卓異調

溫江縣志

卷七

官吏

十四

川八十一

簡州遷巴縣渝城爲川省商埠交涉事道府悉委任之
賴以治民教涉訟維持以法渝民頌之制府岑春煊以
才堪肆應饒於權略奏保軍機處記名擢署重慶府升
授川東道卒於官

曾學傳庚寅三月琴堂嘉宴序蒲城張公由鄉薦膺
孝廉方正科選令溫江先厯權安岳會理所在皆得
民去年冬抵溫未幾有法教謀民宅種害事自法人
行教中國凡與民涉訟地方吏輒猗違鯁鯁畏首尾
芴皇失措僞善治者眇公從容談笑爲溫盪無窮之

螯於指顧間而民眾帖然於戲以公之能究極所至何止福區區邑卽屈百里其鈕奸翼善弱彊梁蘇枯朽興道於已仆振學於旣微俾閭衙郵市凜習漸變革且盡颺熙鼓化浸尋於古少遲奏厥績惟公能於是邦人士相賀曰我公神明父母也吾屬有賴矣今年春三月時和景暉陽雨叶休邦人士又相謂曰我公神明父母也不可無以壽公公聞爲辭吾人請之固公慨然曰吾何堪無已姑以暇日與吾二三父老子弟爲須臾樂可也但不可以此累吾父老子弟於

時煙景寥朗雲物韶媚重曜相望花鳥文章交襍管弦遠邇驩抃牽牢把兕躋堂恐後如家人驩公願吾人安吾人願公壽相率拜手稽首執爵而爲公祝祝曰嘉俎陸陸文罍郁郁公式濟之旣夷且樂再祝曰磊磊綬帶我民式賴驩沸四壘公樂日泰三祝曰樂舞洋洋公醉而康公耆而昌斯猷之光斯人之慶

趙家蕙字季香貴州廣順進士光緒二十九年署邑令邑西大江玉石隄自光緒二十七年大水衝決沒民田萬餘畝前任唐伯森詳報大府撥公款二千三百餘金

修復舊隄以款絀西岸泮濠未疏工甫畢而水又至隄復圯繼任吳麟昌稟撥濟穀售價三千五百金資修築而所用非人移隄上修直逼江心灌邑兩岸田廬衝沒數十家灌人以此上訟大府准發捐納實收券三百分給溫灌兩縣各就地可得捐款二千五百金爲修築之用灌人遂以此款爲賠費從灌令具文催索家蕙方履任詳查顛末報大府請勘事明各用所有款自修麟昌移上之隄令復舊址訟始息而楊義溝敖家灣蕭家灣復大水衝決淹沒民田數十頃家蕙乘肩輿涉水中踏溫江縣志

卷七

官吏

十六

勘災黎滿目盡然淚下遂爲竭誠籌款勸導紳民各踊躍樂輸得款五千八百餘金自玉石隄以下諸隄逐一修固以紓民患沿江之民無不頌趙公德者家蕙性慈惠寬大視百姓若家人聽訟不以威斷惟用勸導年滿畱任旋因學務積案詳報延緩被撤去之日黎老婦孺攀轅塞塗爲流涕者有之三十二年卒於彭縣任所邑士民被其澤者無不爭往哭弔焉

民國知事

楊家翰

楊家翰字西園貴州平越人四川高等學堂畢業部試文科舉人民國七年任縣知事時匪禍徧四境人民夜不安枕家翰毅然以剗鉏民害爲己任督辦團練信賞必罰常日夜短衣出入城鄉飄忽莫測其所在羣盜屏息後忽有大股匪劫劉家濠警隊槍枝家翰聞報率隊窮追一晝夜行百餘里至新津楊公鎮賊忽失蹤家翰歸購綫密偵獲匪首於省城置諸法邑匪風遂肅清羸書役蠹弊爲民害最烈民國革舊官吏率多因循家翰知除積弊非剛斷不可決然廢差役純以鄉民組合司

溫江縣志

卷七

官吏

十七

法警察不留原役一人千餘年糶政爲之一掃而空尋丁母艱去人民感頌之不衰

趙熙光曰張仲和繼楊西園宰溫未到任先詢邑中利弊首創立地方公款收支所以三費公告等款交紳主收此二款舊皆握於縣署溫之士紳屢請而未得者也嘗語人曰吾對於士紳敬禮有加而治匪則不得不從嚴西園吾前導也惟雍和好交雅縣志百餘年未修籌鉅金聘耆儒以續纂之欲民無天札瘥瘠採西人衛生法創辦公園以吸收空養兩氣又以

溫人士雖聰穎而無圖籍資攷證恐見聞舛陋特設
圖書館又欲減輕人民擔負籌設基金儲蓄處此皆
溫邑向所未有其志趣高遠非歷來握三尺以坐堂
皇者所能望其肩背也以外見辦之懲役場及擬辦
簡易工廠凡爲貧民籌生計者無不悉心籌畫所謂
君子學道則愛人以經術飾吏治吾於仲和有取焉

仲和名驥成
都優貢生

曾學傳曰仲和明府詩云官衙尙帶青氈味風雪蕭
蕭正滿城余次其韻有照人朗鏡胸前掛對月清琴

溫江縣志

卷七

官吏

六

膝上橫之句張侯之宰吾邑可謂明且清矣

遺事

宋知縣

孫漸 宗道

孫漸眉州人熙寧進士紹聖中爲邑令邑產瑞芝楊天
惠爲作頌其序云紹聖四年四月八日有芝生於溫江
縣觀音院齋廳之楹一本而數莖煙縷氤氳閱月不散
因扁其處曰芝堂而爲之頌曰西母薦社金精獻奇是
生神草雲英瓊蕤給園之中渝水之涪地其幽矣芳而

孰知陟彼岷宮真人頤頤夜授祕訣謂余奉之沃之醴
泉灌之天池羞以石髓茹而忘飢黃綺爲儔松喬可期
盍獻天子以薦神祇

宗道政和中爲邑令有嘉禾甘露之祥楊天惠爲作二
瑞頌其序云溫江故隸成都遠王畿三千幾百里有奇
蓋西南偏邑政和二年夏六月有嘉禾產於嚴氏之園
凡二本是歲十二月復有甘露降於學宮之柏凡三日
鄉以白縣縣以白府府遣從事卽縣覆狀皆實不誣輒
具書若圖上尙書省以聞詔下其副尙書禮部藏焉於

溫江縣志

卷七

官吏

十九

是前縣臣宗道馳書諭令彭山丞臣天惠曰盍頌諸臣
赴北闕而奏頌曰於皇御極百志惟敘曰農而農曰士
而士爾安乃宮爾寧乃畝恩詔數下仁滂德膺農飽以
歌士喜式舞協氣從之祥嘏如雨乃產嘉禾以慶農扈
乃降甘露以幸士子其慶伊何珠穗紛舉俾爾甌窶戶
有億秭其幸伊何雲液醲滑俾爾膏馥濡及嬰孺維我
哲后博臨下土相彼多禾均此靈露道拜稽首誕告奔
走惠拜稽首盱衡語語致獻稗官以贊矇瞽

曾學傳曰紹聖政和爲宋政濁亂之世南渡之禍實

兆於此州縣修陳祥瑞取媚政府以爲異績豈足訓哉書以志戒舊志又載劉勃元符中爲邑令興學校攷通志及他書無其人惟有劉渤眉州人嘗九上書言時政坐元祐黨籍無令温江事未敢據爲實錄故削之

明知縣

趙紀 李棠 段善 郭肇登 施之炳

趙紀爲邑令著有科貢題名碑記曰詩書者禮義之府而政化之源也自古有天下欲長治久安者未嘗不以

温江縣志

卷七

官吏

三

川川三

學校爲先然而聖人之道大明於上絃誦之音不輟於邑者科舉使之然也自隋唐以來尤貴明經進士聖朝設科四正之歲大比興賢不限解額豪雋之士階以登進者彬彬焉然其考試之法視前世爲加詳本之四書五經以正其體次之詔誥表箋論判以博其用索之三誥經史異同以極其辨旣盡美矣乃得貢於春官登對大廷不數年而列從政之班司民社之寄聲實昭然豈非宜哉温江自癸酉科凡得第者八人教諭余公欲振起銳氣而收累捷之功刻石顯名以勸來者嗟乎一人

倡勇萬夫屬目遊於是者固當奮袂揚英思出其右俾而今而後大書特書不一書而已焉此余之心亦二三子之志也觀此殆亦畱心風教者歟

李棠成化間爲邑令築石城周六百六十一丈爲門五日昭化阜成廣安永寧進賢

段善正德間爲邑令鑿隍池深八尺闊一丈

郭肇登廣東貢生爲邑令給紫奎書院於東門外演武廳左

施之炳南京舉人崇禎十一年任邑令建城上敵臺五

溫江縣志

卷七

官吏

三

門樓櫓十七年張獻忠由重慶趨成都之炳奉巡按劉之渤檄調至省賊已薄城下被執賊令降之炳厲聲罵賊不屈死祀忠義祠

清知縣

朱點 邱璋 田承謨

朱點直隸監生石泉令康熙二十一年署溫江愛民如子政簡刑清

邱璋浙江山陰貢生康熙三十六年任邑令慈祥愛民勸課農桑優禮待士升山西太原知府

田承謨浙江仁和進士康熙四十六年任邑令慈祥愛民勤理政事以文藝課士多所成就

曾學傳曰朱邱田三公皆良吏惜政績不詳姑錄於此以存其槩

魯應才

海桂

謝泰宸
林儁

魯應才湖廣黃陂拔貢康熙四十九年任邑令勤理政事修葺治署新建東門城樓三間洩溫九載欲修縣志未果作備考一篇升東城兵馬司

海桂廣東平遠監生乾隆三十年任邑令改修石城爲

溫江縣志

卷七

官吏

三

輒城周七百三十七丈六尺計程四里一分城樓五題其門東曰和甯南曰贊元曰文明西曰慶豐北曰拱辰踵葺其事者爲謝泰宸林儁

沈裕雲

張心鑑

沈裕雲浙江歸安進士乾隆三十五年署邑令有勸農卽事四首云熟梅天氣雨漫漫百里平疇水不寒阡陌縱橫迷去處斜穿竹徑下輕鞍一竹陰深處野人家半插秧苗半刈麻慚愧老農多厚意馬前擎得一甌茶二危橋仄徑獨登攀平地何殊百二關三水河邊三間渡

西行不是愛看山 三重到山村萬口譁馬蹏間駐大江
千眼前父老知名姓笑指隣封舊長官 四辭氣藹然亦
循良吏也

張心鑑字琬亭江蘇陽湖舉人彭縣令乾隆三十六年
兼署邑篆時金曾梗化王師進討兩縣軍需旁午控愆
晝夜往來備極勞頓心鑑慨然以親民官不遑民事爲
憾遂力辭兼職以去今知事張驥其裔也

李徽典 曠超一 唐伯森

李徽典嘉慶二十二年任邑令不詳其政績善書民多

溫江縣志

卷七

官吏

三

寶之署前書一聯云有閑且勤爾業無事莫入公衙亦
良有司之勸告也百餘年墨跡猶在

曠超一字鳳岡湖南優貢光緒九年署邑令勤理政事
案無畱獄清時州縣官出入儀從必盛超一則畧無宦
氣常單騎下鄉野店疏食皆所不辭遇有呼訴立爲剖
判王銘新少時家寒超一器其才館之署中並濟其家
銘新得以成業超一本賢吏惟邑人議其初終不一茲
特著其美以告後來

唐伯森字蔭廷光緒二十七年署邑令七月大水玉石

隄潰沒民田萬餘畝伯森親臨履勘詳報大府撥公款二千三百餘金修復舊堤以款紂西岸湃濠未疏下游胡家濠田家壩亦未修築工甫畢而水又至堤復圯功雖敗民猶誦其勞

民國知事

陳熙敏

陳熙敏字克欽江蘇武進人遊川歷道府州縣幕民國三年署縣知事操履清正人不敢干以私性慈惠尤善治官書西川道王章祐提賣邑濟倉穀助隄工熙敏告邑紳某力爭藁具熙敏爲易數行閱者皆動容時盜風甚熾未能遽平熙敏歎曰吾爲宰官不能庇吾民吾之罪也何以官爲決計乞休治縣僅數月而去

清教諭

趙鍾嶠 杜翰藩

趙鍾嶠字少峨宜賓舉人嘉慶九年署邑教諭題秋根書屋古柏二首何事秋來悵柳絲煙痕燕影總情癡獨憐古木根偏穩長挺雲霄幹不敬地漬莓苔千尺潤天迴風雪寸心知多緣得氣凝承厚一樣斜陽別樣姿一

娟娟涼露溼蒹葭迴首西風老歲華問種莫分秦漢代
量材合在帝王家巖邊好侶尋元鶴磯底深情感暮鴉
造物也憐清徹骨冬來滿樹著瓊花二又絕句七首老
幹杈柯歲月深多年沉沒古牆陰我來淨掃蒼苔去要
看三冬耐雪心一地近黉宮絕點埃托根先是不凡材
從頭一一加培養定有鸞凰結隊來二曲欄斜抱一窗
虛挺拔挈雲彩欲疎請向樞星門外望錦官城外復何
如三偶爾枝棲托樹旁摩挲終日闡幽光人間大節原
須表豈獨怡情草木香四瀟瀟風雨慰閒官秋樹秋根
溫江縣志

卷七

官吏

三五

川上

一卷攤讀罷藏書聽柏子珠璣歷落響欄杆五人間何
地無喬木難得清陰護講堂明月上時添荇藻一庭化
境訊秋光六參天拔地聳奇姿錯節盤根是我師囑咐
書僮頻掃壁人來箇箇請題詩七玩其辭韻亦校官之
清雅者也
杜翰藩字詩笠萬縣舉人光緒二十二年任邑教諭善
書工吟詠仁八年改江西知縣臨行畱別四章云碧帽
華簪壯此行青山紅樹認歸程一船書畫期東下八月
蒼茫賦北征鳳闕重來聞鬼嘯龍潭百步動神兵時華陽屬

龍潭寺土匪託紅燈教肇亂 筵前一掬新亭淚不獨離人有恨聲一

連年幕燕在危巢篝火叢祠勢正驕譙郡民謠多黑社

塗山軍飾警紅綃風雲燕薊遙相應子弟湖湘未可招

有議整頓團練禦賊者 避地從今麾手去諸君何計靖狐跳 二肯

把儒官薄鄭虔出山仍是在山泉行藏老作搬薑鼠風

露輕移抱樹蟬縣令任人嗤畜道詞臣無夢到神仙讀

書讀律皆吾分誰為蒼生雨九天 三車脚勞勞負米忙

且謀五斗就柴桑登堂一笑毛生檄壽母千金陸賈裝

前路官符銅馬貴故人寶劍匣龍藏臨歧持贈無多語

溫江縣志

卷七

官吏

看取神風過馬當 四

曾學傳曰校官夙稱冷宦求其學行粹茂足為人師

者百不一遇訓導田守倬文章爾雅已為僅見 見前學校

即少峨詩笠之風雅亦幾如空谷足音烏虜所謂師

儒難矣哉

題名

明知縣

李端 見敘論 趙紀 見遺事 趙應奎 全芳 陝西舉人 田永成 陝西舉人

高我先 陝西人 李棠 見遺事 王家泰 江蘇貢生 任繼美 文帽峨

雲南貢生段善見遺黃衷堪貴州貢生蕭魚湖廣舉人張洪巨陝西貢生郭

肇登親見遺胡以濟高諤劉沂施之炳見遺

清知縣

陰廷璜山東貢生蕭永芄治績有傳王日講治績有傳朱點見遺

王瑚治績有傳汪暉江南歲貢黃以成浙江吏員邱璋見遺沈銘浙江貢生

王宗祐治績有傳田成謨見遺許啟盛江南貢生魯應才見遺楊

以寧治績有傳王念臣湖廣進士王者聘治績有傳馮

中存治績有傳莊佳雨貴州舉人王猶龍山東廩生董大銓漢軍舉人張鈞

陝西監生關邦翰浙江舉人海桂見遺謝泰宸附見遺林儁附見遺范

溫江縣志

卷七

官吏

棣廩山西生陳新槐福建附貢曹焜浙江進士申發祥浙江副貢沈裕雲見遺

事蔡宗鑑湖北舉人張心鑑見遺秦昌統廣西舉人劉伯燠直隸進士

丁校河南舉人王有榕湖北優貢高芝江蘇舉人恩福滿州監生戴山年山東

監生臧榮青浙江進士孫念祖盛京舉人白澧山西舉人朱琦江蘇舉人徐掄

元江蘇附貢淡士灝陝西舉人方寶昌順天舉人盧洪科江西舉人廖以莊

舉人湯健業江西監生張晉順天舉人徐時敏浙江副貢王永性江蘇監生

陳懋勤直隸拔貢陳玠浙江進士張仲芳江蘇舉人翟琰安徽舉人

洪蕃鉞福建監生呂仕祺浙江監生沈達江西舉人曹岐山浙江吏員紐正

綱浙江監生胡之富江蘇監生劉有儀治績有傳李紹祖治績有傳張景槐

浙江牛書田山西進士沈學詩順天廩貢李徽興見嘉慶朝王聯

陛治績有傳劉文蔚治績有傳李玉臺江錫麒治績有傳蔡貽齋名

章燮治績有傳劉維嶽治績有傳江懷庭薛廉潘銘

鑑治績有傳段東暹治績有傳吳崇階治績有傳劉松年朱

九蘭繆嘉譽李光庭以上同治朝李承保湖南附貢錢棠江蘇

生顧汝萼浙江附貢茅晟熙山東舉人姚兆元江蘇拔貢雷慶雲湖南監生

沈樹樺治績有傳曠超一見遺事戴作基安徽監生翁載珩盛樾

浙江施德培治績有傳張鐸治績有傳易家霖申麟山西拔貢王恩

澍周慶壬秦宗藩唐伯森見遺事吳麟昌和賡

溫江縣志 卷七 官吏 三六

吉趙家蕙治績有傳鄧爾棨胡鷲立陳志喆歐陽

霖松桂羅必傳周誠以上光緒朝粟宗琦晉和以上

宣統朝 民國知事

袁鈞胡鉉恪陳驥林肇開陳熙敏見遺事沈蘭

序溫懷璋王汝昭楊家翰治績有傳張驥見

曾學傳曰余縣志成已付梓矣適張侯去繼者為嚴

侯希慎甫三月陶侯夢雲繼之僅三十五日又卸事

邑老穉男女頌陶侯如出一口時督軍熊公出省門

呂超入兵亂盜匪四起民無所安息陶侯以治標爲急躬率隊清鄉近一月邑匪蹤平者半而在署聽斷神敏清積案尤夥初有貧兒楊三推小車入市從雇客貿夏布值銀數圓雇客挾布給售主曰吾車腳在此吾就近取贖卽來去而颺售布者扭楊三訟於官付懲役場幾一月其父母日悲泣飢困求人伸救陶侯卽事鄉人請保陶侯提楊三察其爲善良立釋之自出銀六圓予售布者息訟聞者爲之感泣緝衛隊班長夏春山素狡脫稔惡未發又蒙充保安軍下士

在嚴任內嘗拉搥鄉民某事覺被執陶侯蒞任春山請巨紳緩頰留以穿案陶侯坐堂皇審實立正典刑人心大快五師胡營長挾上級官徐某令在興利場招兵陶侯察其姦率隊往禽之斬以徇羣盜屏息不敢逞人咸服其膽略二師蕭與四師團部爭防地戰事在眉睫城中居民驚恐咸閉戶息業陶侯急出署勸民如常理事毋恐徑往省城下獨身入蕭部勸其息爭事平而四師劉已改爲第三軍軍長委新任知事至矣陶侯手批移交案僅數起教署中人辦公須

以良心爲主從容去任人民留不獲莫不羣相歎息
望其異日之復來也陶侯字雲翔簡陽人清諸生幼
所讀四書五經皆其父鏡塘先生手錄指授嘗教之
曰汝異日成人當進爲陶侃退爲陶潛他家屨不墜
其學問淵源若此陶侯居官以平情近理依法爲主
民國六年知羅江縣事熊道尹成章稱爲西川循良
第一今宰吾縣善政之感人尤速烏虛以三十五日
之吏其得人心若此可以法矣余懼其久而湮也因
特著於斯以告來者

嚴希慎卸任其案牘李士慶
奉委代理九日陶侯始接任